

Na osnovu člana 30. stav (1) tačka g) i stav (2) i člana 37. stav (1) Zakona o platama i naknadama u institucijama Bosne i Hercegovine ("Službeni glasnik BiH", br. 50/08, 35/09 i 75/09), člana 50. stava 4. tačka m) Zakona o radu u institucijama Bosne i Hercegovine ("Službeni glasnik BiH", br. 26/04, 7/05, 48/05 i 60/10) i člana 17. Zakona o Savjeta ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), na prijedlog Ministarstva finansija i trezora Bosne i Hercegovine, Savjet ministara Bosne i Hercegovine, na 5. sjednici održanoj 18. aprila 2012. godine, donio je

ODLUKU

o načinu i postupku ostvarivanja prava zaposlenih u institucijama Bosne i Hercegovine na troškove smještaja, naknadu za odvojeni život i naknadu za privremeno raspoređivanje

Neslužbeni prečišćeni tekst („Službeni glasnik BiH“, br. 42/12, 78/12, 51/13 i 68/18)

DIO PRVI - OPŠTE ODREDBE

Član 1. (Predmet Odluke)

Ovom Odlukom uređuje se način i postupak ostvarivanja prava zaposlenih u institucijama Bosne i Hercegovine na troškove smještaja, naknadu za odvojeni život i naknadu za privremeno raspoređivanje.

Član 2. (Udaljenost mjesta rada od mjesta prebivališta)

Udaljenost mjesta rada/mjesta obavljanja službene dužnosti od mjesta prebivališta zaposlenog u instituciji Bosne i Hercegovine utvrđuje se od tačne adrese mjesta prebivališta do tačne adrese mjesta rada/mjesta obavljanja službene dužnosti.

DIO DRUGI - UTVRĐIVANJE PRAVA NA TROŠKOVE SMJEŠTAJA, NAKNADU ZA ODVOJENI ŽIVOT I NAKNADU ZA PRIVREMENO RASPOREĐIVANJE

GLAVA I - PROFESIONALNO VOJNO LICE

Član 3.
(Naknada troškova smještaja)

(1) Profesionalno vojno lice ima pravo na mjesečnu naknadu troškova smještaja od dana stupanja na dužnost pod uslovom da mu je mjesto prebivališta udaljeno više od 80 km od mjesta službe u Oružanim snagama Bosne i Hercegovine i Ministarstvu odbrane Bosne i Hercegovine u koju je raspoređen, i to:

a) profesionalno vojno lice-general ima pravo na mjesečnu naknadu troškova smještaja u iznosu do osnovice za obračun plate utvrđene u skladu sa članom 7. stav (1) Zakona o platama i naknadama u institucijama Bosne i Hercegovine.

b) profesionalno vojno lice-oficir ima pravo na mjesečnu naknadu troškova smještaja u iznosu do 300,00 KM.

c) profesionalno vojno lice-podoficir ima pravo na mjesečnu naknadu troškova smještaja u iznosu do 250,00 KM.

d) profesionalno vojno lice-vojn timer ima pravo na mjesečnu naknadu troškova smještaja u iznosu do 150,00 KM.

(2) Ako je profesionalnom vojnom licu obezbjeđen smještaj od strane poslodavca isti nema pravo na naknadu troškova smještaja.

Član 4.
(Naknada za odvojeni život)

(1) Profesionalno vojno lice koje je premješteno po potrebi službe ima pravo na mjesečnu naknadu za odvojeni život u iznosu od 300,00 KM od dana stupanja na dužnost, pod uslovom da mu je mjesto prebivališta udaljeno više od 80 km od mjesta službe u Oružanim snagama Bosne i Hercegovine i Ministarstva odbrane Bosne i Hercegovine u koju je raspoređen.

(2) Profesionalno vojno lice koje je premješteno na vlastiti zahtjev, nema pravo na naknadu za odvojeni život.

GLAVA II - POLICIJSKI SLUŽBENICI

Član 5.
(Naknada troškova smještaja)

(1) Policijski službenik sa činom glavni generalni inspektor policije, generalni inspektor policije, glavni inspektor i samostalni inspektor ima pravo na mjesečnu naknadu troškova smještaja, pod uslovom da mu je mjesto prebivališta udaljeno od mjesta obavljanja službenih dužnosti više od 80 km, i to:

a) policijski službenik sa činom glavni generalni inspektor policije i generalni inspektor policije ima pravo na mjesečnu naknadu troškova smještaja u iznosu do osnovice za obračun plate utvrđene u skladu sa članom 7. stav (1) Zakona o platama i naknadama u institucijama Bosne i Hercegovine.

b) policijski službenik sa činom glavni inspektor ima pravo na mjesečnu naknadu troškova smještaja u iznosu do 400,00 KM.

c) policijski službenik sa činom samostalni inspektor ima pravo na mjesečnu naknadu troškova smještaja u iznosu do 300,00 KM.

(2) U izuzetnim slučajevima, gdje je nužno obezbijediti nacionalnu zastupljenost zaposlenih, direktor policijske agencije može, uz mišljenje resornog ministra, utvrditi pravo na mjesečnu naknadu troškova smještaja i za policijskog službenika sa činom viši inspektor u iznosu do 300,00 KM, pod uslovom da mu je mjesto prebivališta udaljeno od mjesta obavljanja službenih dužnosti više od 80 km.

Član 6. (Naknada za odvojeni život)

Policijski službenik naveden u članu 5. ove Odluke ima pravo na mjesečnu naknadu za odvojeni život u iznosu od 300,00 KM, pod uslovom da mu je mjesto prebivališta udaljeno od mjesta obavljanja službenih dužnosti više od 80 km.

GLAVA III - ZAPOSLENI U OBAVJEŠTAJNO - BEZBJEDNOSNOJ AGENCIJI

Član 7. (Naknada troškova smještaja)

Generalni direktor, zamjenik generalnog direktora, glavni inspektor, zaposleni u Obavještajno-bezbjednosnoj agenciji Bosne i Hercegovine koji obavlja operativne poslove, te zaposleni koji obavlja poslove neposredno vezane uz operativne poslove ima pravo na mjesečnu naknadu troškova smještaja, pod uslovom da mu je mjesto prebivališta udaljeno od mjesta obavljanja službenih dužnosti više od 80 km, i to:

a) generalni direktor, zamjenik generalnog direktora i glavni inspektor ima pravo na mjesečnu naknadu troškova smještaja u iznosu do osnovice za obračun plate utvrđene u skladu sa članom 7. stav (1) Zakona o platama i naknadama u institucijama Bosne i Hercegovine,

b) zaposleni koji obavlja operativne poslove ima pravo na mjesečnu naknadu troškova smještaja u iznosu do 300,00 KM,

c) zaposleni koji obavlja poslove neposredno vezane uz operativne poslove ima pravo na mjesečnu naknadu troškova smještaja u iznosu do 250,00 KM.

Član 8.
(Naknada za odvojeni život)

Zaposleni u Obavještajno-bezbjednosnoj agenciji Bosne i Hercegovine naveden u članu 7. ove Odluke ima pravo na mjesečnu naknadu za odvojeni život u iznosu od 300,00 KM, pod uslovom da mu je mjesto prebivališta udaljeno od mjesta obavljanja službenih dužnosti više od 80 km.

GLAVA IV - ZAPOSLENI U UPRAVI ZA INDIREKTNO OPOREZIVANJE

Član 9.
(Naknada troškova smještaja)

Direktor, pomoćnik direktora, šef kabineta, načelnik odjeljenja i šef unutrašnje organizacione jedinice (odsjeka, grupe, ispostave) u Upravi za indirektno oporezivanje ima pravo na mjesečnu naknadu troškova smještaja, pod uslovom da mu je mjesto prebivališta udaljeno od mjesta rada više od 80 km i to:

- a) direktor ima pravo na mjesečnu naknadu troškova smještaja u iznosu do osnovice za obračun plate utvrđene u skladu sa članom 7. stav (1) Zakona o platama i naknadama u institucijama Bosne i Hercegovine,
- b) pomoćnik direktora, šef kabineta i načelnik odjeljenja ima pravo na mjesečnu naknadu troškova smještaja u iznosu do 400,00 KM,
- c) šef unutrašnje organizacione jedinice-odsjeka, grupe, ispostave ima pravo na mjesečnu naknadu troškova smještaja u iznosu do 300,00 KM.

Član 10.
(Naknada za odvojeni život)

Zaposleni u Upravi za indirektno oporezivanje naveden u članu 9. ove Odluke ima pravo na mjesečnu naknadu za odvojeni život u iznosu od 300,00 KM, pod uslovom da mu je mjesto prebivališta udaljeno od mjesta rada više od 80 km.

GLAVA V - ŠTIĆENO LICE

Član 11.
(Naknada troškova smještaja)

Izabrano ili imenovano lice, koje se štiti na osnovu člana 6. stav (1) tačka h) Zakona o direkciji za koordinaciju policijskih tijela i o agencijama za podršku policijskoj strukturi Bosne i Hercegovine ("Službeni glasnik BiH", broj 36/08), na koju se primjenjuju odredbe Zakona o platama i naknadama u institucijama Bosne i Hercegovine, ostvaruje pravo na naknadu troškova smještaja, u skladu sa odredbama Odluke o načinu i postupku ostvarivanja prava pojedinih izabranih i imenovanih lica u institucijama Bosne i Hercegovine na troškove smještaja ("Službeni glasnik BiH", broj 10/10), pod uslovom da mu je mjesto prebivališta udaljeno od mjesta rada više od 80 km.

Član 12.
(Naknada za odvojeni život)

Izabrano ili imenovano lice iz člana 11. ove Odluke ima pravo na mjesečnu naknadu za odvojeni život u iznosu od 300,00 KM, pod uslovom da mu je mjesto prebivališta udaljeno od mjesta rada više od 80 km.

GLAVA Va - POSLANICI I DELEGATI U PARLAMENTARNOJ SKUPŠTINI BOSNE I HERCEGOVINE

Član 12a.

Poslanik i delegat u Parlamentarnoj skupštini Bosne i Hercegovine ima pravo na mjesečnu naknadu troškova smještaja u iznosu do osnovice za obračun plate utvrđene u skladu sa članom 7. stav (1) Zakona o platama i naknadama u institucijama Bosne i Hercegovine, pod uslovom da mu je mjesto prebivališta udaljeno od mjesta rada više od 80 km.

Član 12b.

Poslanik i delegat u Parlamentarnoj skupštini Bosne i Hercegovine ima pravo na mjesečnu naknadu za odvojeni život u iznosu od 300,00 KM, pod uslovom da mu je mjesto prebivališta udaljeno od mjesta rada više od 80 km.

GLAVA VI - DRŽAVNI SLUŽBENICI I OSTALI

Član 13.
(Naknada troškova smještaja)

Rukovodilac, zamjenik rukovodioca i pomoćnik rukovodioca institucije Bosne i Hercegovine, savjetnik funkcionera, sekretar, glavni inspektor, na koga se ne primjenjuju odredbe Zakona o državnoj službi u institucijama Bosne i Hercegovine ("Službeni glasnik BiH", br. 19/02, 35/03, 4/04, 17/04, 26/04, 37/04, 48/05, 2/06, 32/07 i 43/09), te rukovodeći državni službenik, ima pravo na mjesečnu naknadu troškova smještaja pod uslovom da mu je mjesto prebivališta udaljeno od mjesta rada više od 80 km, i to:

a) rukovodilac, zamjenik rukovodioca institucije Bosne i Hercegovine na koga se ne primjenjuju odredbe Zakona o državnoj službi u institucijama Bosne i Hercegovine, ima pravo na mjesečnu naknadu troškova smještaja u iznosu do osnovice za obračun plate utvrđene u skladu sa članom 7. stav (1) Zakona o platama i naknadama u institucijama Bosne i Hercegovine.

b) savjetnik funkcionera, sekretar, glavni inspektor i pomoćnik rukovodioca na koga se ne primjenjuju odredbe Zakona o državnoj službi u institucijama Bosne i Hercegovine ima pravo na mjesečnu naknadu troškova smještaja u iznosu do 400 KM.

c) sekretar na posebnom zadatku ima pravo na mjesečnu naknadu troškova smještaja u iznosu do osnovice za obračun plate utvrđene u skladu sa članom 7. stav (1) Zakona o platama i naknadama u institucijama Bosne i Hercegovine.

d) ostali rukovodeći državni službenici imaju pravo na mjesečnu naknadu troškova smještaja u iznosu do 400,00 KM.

Član 14. (Naknada za odvojeni život)

Zaposleni u instituciji Bosne i Hercegovine naveden u članu 13. ove Odluke ima pravo na mjesečnu naknadu za odvojeni život u iznosu od 300,00 KM, pod uslovom da mu je mjesto prebivališta udaljeno od mjesta rada više od 80 km.

GLAVA VII - NAKNADA ZA PRIVREMENO RASPOREĐIVANJE

Član 15. (Naknada za privremeno raspoređivanje)

(1) Policijski službenik koji je prema članu 64. Zakona o policijskim službenicima Bosne i Hercegovine ("Službeni glasnik BiH", br. 27/04, 63/04, 5/06, 33/06, 58/06, 15/08, 63/08 i 35/09) privremeno premješten (raspoređen) na drugo radno mjesto ima pravo na mjesečnu naknadu za privremeno raspoređivanje, pod uslovom da mu je mjesto prebivališta udaljeno od njegovog trenutnog mjesta rada više od 80 km, i ista se sastoji od:

a) naknade za odvojeni život u visini od 300,00 KM;

b) naknade za smještaj u visini do 300,00 KM.

(2) Naknada iz stava (1) ovog člana može se isplaćivati najduže do jedne godine.

(3) Policijski službenik koji je premješten po ličnom zahtjevu nema pravo na naknadu za privremeno raspoređivanje.

(4) Odredbe stava (1) ovog člana ne primjenjuju se na policijskog službenika koji je prvi put raspoređen na posao.

Član 16.

(Naknada za privremeno raspoređivanje-policijski službenik u pratnji štićene ličnosti)

(1) Policijski službenik koji je prema članu 64. Zakona o policijskim službenicima Bosne i Hercegovine ("Službeni glasnik BiH", br. 27/04, 63/04, 5/06, 33/06, 58/06, 15/08, 63/08 i 35/09) privremeno premješten (raspoređen) na poslove obezbjeđenja štićene ličnosti ima pravo na mjesečnu naknadu za privremeno raspoređivanje, pod uslovom da mu je mjesto prebivališta udaljeno od njegovog trenutnog mjesta rada više od 80 km, i ista se sastoji od:

a) naknade za odvojeni život u visini od 300,00 KM;

b) naknade za smještaj u visini do 300,00 KM.

(2) Izuzetno od odredaba stava (1) ovog člana, ukoliko je štićena ličnost smještena u objektu u kojem je cijena smještaja veća od iznosa naknade troškova smještaja na koju ima pravo policijski službenik iz stava (1) ovog člana, direktor Direkcije za koordinaciju policijskih tijela može utvrditi pravo na naknadu troškova smještaja u iznosu većem od iznosa utvrđenog u stavu (1) ovog člana.

(3) Ukoliko policijski službenik pravo na naknadu troškova smještaja ostvaruje u skladu sa odredbama iz stava (2) ovog člana, direktor Direkcije za koordinaciju policijskih tijela dužan je racionalizovati troškove smještaja policijskih službenika, kao što je zajednički smještaj dva ili više policijskih službenika.

DIO TREĆI - IZUZECI U PRIMJENI I POSTUPAK OSTVARIVANJA PRAVA

Član 17.

(Izuzeci u primjeni)

(1) Zaposleni u instituciji Bosne i Hercegovine koji koristi službeno vozilo za dnevni dolazak na posao i odlazak sa posla od mjesta prebivališta do mjesta rada nema pravo na naknadu troškova smještaja i naknadu za odvojeni život, u skladu odredbama ove Odluke.

(2) Zaposleni u instituciji Boske i Hercegovine koji dnevno putuje od mjesta prebivališta do mjesta rada i po tom osnovu ostvaruje pravo na naknadu troškova prevoza na posao i prevoza sa posla nema pravo na naknadu za troškove smještaja i naknadu za odvojeni život, u skladu sa odredbama ove Odluke.

(3) Zaposlenom u instituciji Bosne i Hercegovine ne pripada pravo na naknadu za odvojeni život za dane provedene na bolovanju, godišnjem odmoru, plaćenom i neplaćenom odsustvu, u mirovnim ili drugim misijama izvan Bosne i Hercegovine.

(4) Zaposleni u instituciji Bosne i Hercegovine koji je upućen na službeni put, koji traje duže od jednog dana, odnosno za koji se obračunava više od jedne dnevnice, za vrijeme trajanja istog nema pravo na naknadu za odvojeni život.

Član 18.

(Postupak ostvarivanja prava na naknadu)

(1) Da bi zaposleni u instituciji Bosne i Hercegovine ostvario pravo na naknadu troškova smještaja i naknadu za odvojeni život, u skladu sa odredbama ove Odluke, dužan je podnijeti zahtjev za isplatu predmetne naknade.

(2) Zaposleni u instituciji Bosne i Hercegovine pravo na naknadu troškova smještaja i naknadu za odvojeni život ostvaruje na osnovu rješenja koje izdaje nadležna institucija Bosne i Hercegovine.

(3) Isplata naknade za odvojeni život vrši se na tekući račun zaposlenog u instituciji Bosne i Hercegovine dok se naknada troškova smještaja uplaćuje zakupodavcu na osnovu ugovora o zakupu stambenog prostora, ovjerenog od strane nadležne poreske uprave, koji je sa istim zaključio zaposlenik institucije Bosne i Hercegovine.

(4) U slučaju da je zaposleni u instituciji Bosne i Hercegovine zaključio ugovor o zakupu stambenog prostora u vrijednosti većoj od iznosa mjesečne naknade troškova smještaja na koju ima pravo, institucija uplaćuje zakupodavcu naknadu u visini koja je utvrđena rješenjem iz stava (2) ovog člana.

(5) U slučaju da je zaposleni u instituciji Bosne i Hercegovine zaključio ugovor o zakupu stambenog prostora u vrijednosti manjoj od iznosa mjesečne naknade troškova smještaja na koju ima pravo, institucija uplaćuje zakupodavcu naknadu u visini cijene zakupa.

(6) Izuzetno od odredbi stava (3) ovog člana, isplata naknade troškova smještaja za zaposlene u Ministarstvu odbrane Bosne i Hercegovine i Oružanim snagama Bosne i Hercegovine vršiće se na tekući račun zaposlenog.

Član 19.

(Istinitost podataka)

(1) Osnovanost zahtjeva za naknadu za odvojeni život i naknadu za troškove smještaja utvrđuje se na osnovu podataka iz prijave o mjestu prebivališta prema službenim ličnim podacima, koju izdaje nadležna institucija, a koja je sastavni dio službene evidencije koju vodi nadležna organizacijska jedinica za pravne i kadrovske poslove u instituciji Bosne i Hercegovine.

(2) Dostavljanje neistinitih podataka ili neažuriranje podataka vezanih za ostvarivanje prava na naknadu za odvojeni život i naknadu za troškove smještaja smatra se težom povredom radnih dužnosti i podliježe disciplinskoj i materijalnoj odgovornosti. Institucija Bosne i Hercegovine može, u cilju otklanjanja mogućih zloupotreba ostvarivanja prava na predmetne naknade, formirati posebnu komisiju.

DIO ČETVRTI - OBRAČUN I ISPLATA NAKNADA

Član 20. (Obračun i isplata naknada)

(1) Obračun i isplata naknade za odvojeni život vrši se uz mjesečni obračun i isplatu plata i naknada zaposlenih u institucijama BiH na osnovu rješenja koje izdaje nadležna institucija Bosne i Hercegovine.

(2) Evidentiranje i izmirenje obaveza po osnovu naknade troškova smještaja vrši se na osnovu rješenja izdatog od strane nadležne institucije Bosne i Hercegovine, te ugovora koji je sa zakupodavcem zaključio zaposlenik institucije Bosne i Hercegovine prema procedurama evidentiranja obaveza i njihovog plaćanja preko Informacijskog sistema finansijskog upravljanja (ISFU).

(3) Izuzetno od odredbi stava (2) ovog člana, isplata naknade troškova smještaja za zaposlene u Ministarstvu odbrane Bosne i Hercegovine i Oružanim snagama Bosne i Hercegovine vršiće se uz mjesečni obračun i isplatu plata i naknada zaposlenih u Ministarstvu odbrane Bosne i Hercegovine i Oružanim snagama Bosne i Hercegovine, na osnovu rješenja koje izdaje Ministarstvo odbrane Bosne i Hercegovine i Oružane snage Bosne i Hercegovine, te ugovora koji je sa zakupodavcem zaključio zaposlenik, koji je ovjeren u nadležnoj poreskoj upravi.

DIO PETI - ZAVRŠNE ODREDBE

Član 21. (Provedba Odluke)

Za provođenje ove Odluke zadužuju se institucije Bosne i Hercegovine i Ministarstvo finansija i trezora.

Član 22. (Prestanak važenja)

Stupanjem na snagu ove Odluke prestaje da važi Odluka o načinu obračuna plata i drugih naknada zaposlenih u Savjetu ministara Bosne i Hercegovine, ministarstvima Bosne i Hercegovine, i drugim institucijama i tijelima Savjeta ministara Bosne i Hercegovine (SM br. 260/02, 177/03, 140/04, 173/04, 257/04, 299/04, 310/04, 2/06, 128/06, 195/06, 198/06 i 217/06), kao i drugi podzakonski akti ili dijelovi podzakonskih akata institucija Bosne i Hercegovine, kojima je regulisano pravo na troškove smještaja, naknadu za odvojeni život i naknadu za privremeno raspoređivanje.

Član 23. (Stupanje na snagu)

Ova Odluka stupa na snagu danom stupanja na snagu Zakona o Budžetu institucija Bosne i Hercegovine i međunarodnih obaveza Bosne i Hercegovine za 2012. godinu i objavljuje se u "Službenom glasniku BiH", a primjenjivaće se od 01.05.2012. godine.

(2) Izuzetno od odredbi stava (1) ovog člana, odredbe koje se odnose na troškove smještaja zaposlenih u institucijama Bosne i Hercegovine primjenjivaće se od 01.06.2012. godine.